

秦  
漢  
書  
疏

西漢書疏卷之二

明武昌吳國倫校

漢文帝

晁錯

潁川人御史大夫

上言兵事

論

臣聞漢興以來胡虜數入邊地小入則小利大入則大利高后時再入隴西攻城屠邑毆略畜產其後復入隴西殺吏卒大寇盜竊聞戰勝之威民氣百倍敗兵之卒沒世不復自高后以來隴西三困於匈奴矣民氣破傷亡有勝意今茲隴西之吏賴

社稷之神靈奉陛下之明詔和輯士卒底厲其節  
起破傷之民以當乘勝之匈奴用少擊衆殺一王  
敗其衆而法曰大有利非隴西之民有勇怯廼將  
吏之制巧拙異也故兵法曰有必勝之將無必勝  
之民繇此觀之繇同與安邊境立功名在於良將不  
可不擇也臣又聞用兵臨戰合刃之急者三一日  
得地形二曰卒服習三曰器用利兵法曰丈五之  
溝漸車之水山林積石經川丘阜草木所在此步  
兵之地也車騎二不當一土山丘陵曼衍相屬平  
原廣野此車騎之地步兵十不當一平陵相遠川

谷居間仰高臨下此弓弩之地也短兵百不當一  
兩陳相近平地淺草可前可後此長戟之地也劒  
楯三不當一萑葦竹蕭草木蒙龍支葉茂接此矛  
鋌之地也長戟二不當一曲道相伏險阨相薄此  
劒楯之地也弓弩三不當一士不選練卒不服習  
起居不精動靜不集趨利弗及避難不畢前擊後  
解與金鼓之音相失此不習勒兵之過也百不當  
十兵不完利與空手同甲不堅密與袒裊同袒裊肉袒  
也弩不可以及遠與短兵同射不能中與亡矢同  
中不能入與亡鏃同此將不省兵之禍也五不當

一故兵法曰器械不利以其卒予敵也卒不可用  
以其將予敵也將不知兵以其主予敵也君不擇  
將以其國予敵也四者兵之至要也臣又聞小大  
異形強弱異勢險易異備夫卑身以事強小國之  
形也合小以攻大敵國之形也以蠻夷攻蠻夷中  
國之形也今匈奴地形技藝與中國異上下山阪  
出入溪澗中國之馬弗與也險道傾仄且馳且射  
中國之騎弗與也風雨罷勞飢渴不困中國之人  
弗與也此匈奴之長技也若夫平原易地輕車突  
騎則匈奴之衆易撓亂也勁弩長戟射䟽及遠則

匈奴之弓弗能格也堅甲利刃長短相雜遊弩往來什伍俱前則匈奴之兵弗能當也材官騶發矢道同的則匈奴之革筈木薦弗能支也下馬地闢劍戟相接去就相薄則匈奴之足弗能給也此中國之長技也以此觀之匈奴之長技三中國之長技五陛下又興數十萬之衆以誅數萬之匈奴衆寡之計以一擊十之術也雖然兵凶器戰危事也以大爲小以強爲弱在俛仰之間耳夫以人之死爭勝跌而不振則悔之亡及也帝王之道出於萬全今降胡義渠蠻夷之屬來歸誼者其衆數千飲

食長技與匈奴同可賜之堅甲絮衣勁弓利矢益以邊郡之良騎令明將能知其習俗和輯其心者以陛下之明約將之卽有險阻以此當之平地通道則以輕車材官制之兩車相爲表裏各用其長技衛加之以衆此萬全之術也傳曰狂夫之言而明主擇焉臣錯愚陋昧死上狂言唯陛下財擇

### 論守邊備塞事

臣聞秦時北攻胡貉築塞河上南攻楊粵置戍卒焉其起兵而攻胡粵者非以衛邊地而救民死也貪戾而欲廣大也故功未立而天下亂且夫起兵

而不知其勢戰則爲人禽屯則卒積死夫胡貉之

地積陰之處也木皮三寸米厚六尺食肉而飲酪

其人密理鳥獸毳毛其性能寒

能讀曰耐

楊粵之地少

陰多陽其人䟽理鳥獸希毛其性能暑秦之戍卒

不能其水土戍者死於邊輸者僨於道秦民見行

如徃棄市因以謫發之名曰謫戍先發吏有謫及

贅壻賈人後以嘗有市籍者又後以大父母父母

嘗有市籍者後入閭取其左發之不順行者深怨

有背畔之心凡民守戰至死而不降北者以計爲

之也故戰勝守固則有拜爵之賞攻城屠邑則得

其財鹵以富家室故能使其衆蒙矢石赴湯火視死如生今秦之發卒也有萬死之害而亡銖兩之報死事之後不得一筭之復天下明知禍烈及已也陳勝行戍至於大澤爲天下先倡天下從之如流水者秦以威劫而行之之敝也胡人衣食之業不著於地其勢易以擾亂邊竟何以明之胡人食肉飲酪衣皮毛非有城郭田宅之歸居如飛鳥走獸於廣野美草甘水則止草盡水竭則移以是觀之往來轉徙時至時去此胡人之生業而中國之所以南晦

晦

古

今使胡人數處轉牧行獵於塞

下或當燕代或當上郡北地隴西以候備塞之卒

卒少則入陛下不救則邊民絕望而有降敵之心救

之少發則不足多發遠縣纔至則胡又已去聚而

不罷爲費甚大罷之則胡復入如此連年則中國

貧苦而民不安矣陛下幸憂邊竟遣將吏發卒以

治塞甚大惠也然令遠方之卒守塞一歲而更不

知<sub>之</sub>之能不如選常居者家室田作且以備之

以便爲之高城深塹具蘭石布渠荅<sub>渠荅鐵蒺藜也蘭石城上</sub>

<sub>雷石也</sub>復爲一城其內城間百五十步要害之處通

川之道調立城邑毋下千人爲中周虎落<sub>虎落者以竹篾</sub>

相連遮落之也

先爲室屋具田器廼募臯人及免徒復作

今居之

募有罪者及罪人遇赦復作竟其日月者今皆除其罰令居之也

不足募

以丁奴婢贖臯及輸奴婢欲以拜爵者不足廼募

民之欲往者皆賜高爵復其家予冬夏衣廩食能

自給而止郡縣之民得買其爵以自增至卿其亡

夫若妻者縣官買予之人情非有匹敵不能久安

其處塞下之民祿利不厚不可使久居危難之地

胡人入驅而能止其所驅者以其半予之縣官爲

贖其民如是則邑里相救助赴胡不避死非以德

上也欲全親戚而利其財也此與東方之戍卒不

習地勢而心畏胡者功相萬也以陛下之時徙民實邊使遠方亡屯戍之事塞下之民父子相保亡係虜之患利施後世名稱聖明其與秦之行怨民相去遠矣

### 論募民徙塞下

陛下幸募民相徙以實塞下使屯戍之事益省輸將之費益寡甚大惠也下吏誠能稱厚惠奉明法存卹所徙之老弱善遇其壯士和輯其心而勿侵刻使先至者安樂而不思故鄉則貧民相募而勸往矣臣聞古之徙遠方以實廣虛相其陰陽之和

嘗其水泉之味審其土地之宜觀其草木之饒然  
後營邑立城制里割宅通田作之道正阡陌之界  
先爲築室家有一堂二內門戶之閉置器物焉民  
至有所居作有所用此民所以輕去故鄉而勸之  
新邑也爲置醫巫以救疾病以修祭祀男女有昏  
生死相卹墳墓相從種樹畜長室屋完安此所以  
使民樂其處而有長居之心也臣又聞古之制邊  
縣以備敵也使五家爲伍伍有長十長一里里有  
假士四里一連連有假五百十連一邑邑有假候  
皆擇其邑之賢材有護習地形知民心者居則習

民於射法出則教民於應敵故卒伍成於內則軍  
政定於外服習以成勿令遷徙幼則同游長則共  
事夜戰聲相知則足以相救晝戰目相見則足以  
相識謹愛之心足以相死如此而勸以厚賞威以  
重罰則前死不還踵矣所徙之民非壯有材力但  
費衣糧不可用也雖有材力不得良吏猶亡功也  
陛下絕匈奴不與和親臣竊意其冬來南也壹大  
治則終身創矣欲立威者始於折膠匈奴常以爲  
候而出軍秋氣至膠可  
折弓弩可用  
來而不能困使得氣去後未易服也  
愚臣亡識唯陛下財察

袁盎

楚人  
中郎

諫文帝

文帝從霸陵上欲西馳下峻阪袁盎諫曰

臣聞千金之子坐不垂堂百金之子不騎衡

騎倚也

樓殿邊欄楯也

聖主不乘危而徼幸今陛下騁六駢馳下

峻山如有馬驚車敗陛下縱自輕奈高廟太后何

上乃止

張釋之

堵陽人  
廷尉

諫拜嗇夫

文帝詔釋之拜虎圈嗇夫爲上林令釋之前

曰

夫絳侯東陽侯稱爲長者此兩人言事曾不能出口豈數此嗇夫諛諛漢書作喋喋多言也利口捷給哉且秦以任刀筆之吏吏爭以亟病苛察相高然其敝徒文具耳無惻隱之實以故不聞其過陵遲而至於二世天下土崩今陛下以嗇夫口辯而超遷之臣恐天下隨風靡靡爭爲口辯而無實且下之化上疾於景響舉不可不審也文帝曰善

論犯蹕法

上行出中渭橋有一人從橋下出乘輿馬驚

捕屬廷尉治之廷尉奏一人犯蹕當罰金文帝怒曰此人親驚吾馬吾馬賴柔和令他馬固不敗傷我乎而廷尉乃當之罰金釋之曰法者天子所與天下公共也今法如此而更重之是法不信於民也且方其時上使立誅之則已今既下廷尉廷尉天下之平也一傾而天下用法皆爲輕重民安所錯其手足唯陛下察之

馮唐

安陵人車騎都尉

對文帝不能用頗牧

文帝問馮唐曰公何以知吾不能用廉頗李

牧唐對曰

臣聞上古王者之遣將也跪而推轂曰閫以內者寡人制之閫以外者將軍制之軍功爵賞皆決於外歸而奏之此非虛言也臣大父言李牧爲趙將居邊軍市之租皆自用饗士賞賜決於外不從中掇也委任而責成功故李牧乃得盡其智能遣選車千三百乘六韜有選車之法穀騎萬三千穀騎與千金之士十萬其貴重是以北逐單于破東胡滅澹林一作西抑疆秦南支韓魏當是之時趙幾霸其一作本後會趙王遷立其母倡也王遷立乃用郭開譏卒

誅李牧

開是趙王寵臣秦多與開金使為反間

今顏聚代之漢書作

將是以兵破士北為秦所禽滅今臣竊聞魏尚為

雲中守其軍市租盡以饗士卒私養錢五日一椎

牛饗賓客軍吏舍人是以匈奴遠避不近雲中

塞虜曾一入尚率車騎擊之所殺甚衆夫士卒盡

家人子起田中從軍安知尺籍五符按尺籍音謂

功於一尺之板伍符者命軍人伍伍相保不容奸詐也終日力戰斬首捕虜

上功莫府一言不相應文吏以法繩之其賞不行

而吏奉法必用臣愚以為陛下法太明賞太輕罰

太重且雲中守魏尚坐上功首虜差六級陛下

之吏削其爵罰作之由此言之陛下雖得廉頗李牧弗能用也

田叔

趙陘城人魯相

對文帝問長者

文帝召田叔問之曰公知天下長者乎叔曰  
故雲中守孟舒長者也上曰先帝置孟舒雲  
中十餘年虜曾一入孟舒不能堅守毋故士  
卒戰死者數百人長者固殺人乎叔叩頭對  
曰

是乃孟舒所以爲長者也夫貫高等謀反上下明

詔趙有敢隨張王罪三族然孟舒自髡鉗隨張王  
敖之所在欲以身死之豈自知爲雲中守哉漢與  
楚相距士卒罷敝匈奴冒頓新服北夷來爲邊害  
孟舒知士卒罷敝不忍出言士爭臨城死敝如子  
爲父弟爲兄以故死者數百人孟舒豈故驅戰之  
哉是乃孟舒所以爲長者也於是上曰賢哉孟舒  
復召孟舒以爲雲中守

鄒陽齊人

獄中上吳王書

陽事吳王濞王陰有邪謀思奏書諫之王下

陽獄故陽從獄中上書曰

臣聞忠無不報信不見疑臣常以爲然徒虛語耳

昔者荆軻慕燕丹之義白虹貫日太子畏之衛先生爲秦畫長平之事太白蝕昴昭王疑之夫精誠變天地而信不諭兩主豈不哀哉今臣盡忠竭誠畢議願知

盡其計議願王知之

左右不明卒從吏訊爲世所

疑是使荆軻衛先生復起而燕秦不悟也願大王

熟察之昔玉人獻寶楚王誅之李斯竭忠胡亥極

刑是以箕子陽狂接輿避世恐遭此患也願大王察

玉人李斯之意而後楚王胡亥之聽無使臣爲箕

子接輿所笑臣聞比干剖心子胥鴟夷

子胥自剄王乃以子

胥尸盛以鴟夷之革浮之江中

臣始不信乃今知之願大王熟察

少加憐焉語曰白頭如新傾蓋如故何則知與不

也故樊於期逃秦之燕藉荆軻首以奉丹事

荆軻見樊

於期曰願得將軍之首以獻秦王秦王必喜見王臣左手持其袖右手提其胸於期從之自刎王

奢去齊之魏臨城自剄以却齊而存魏

奢齊臣也自齊亡之

魏齊伐魏奢登城謂齊將曰今君之來不夫王奢遇以奢故也義不苟生以為魏累遂自剄

樊於期非新於齊秦而故於燕魏也所以去二國

死兩君者行合於志而慕義無窮也是以蘇秦不

信天下為燕尾生

蘇秦於秦不出其信於燕則出尾生之信也

白圭戰

亡六城爲魏取中山白圭爲中山將亡六城君欲誅之亡入魏文侯厚過之還

拔中何則誠有以相知也蘇秦相燕人惡之於燕

王燕王按劍而怒食以駉騊珍奇味白圭顯於中山

人惡之於魏文侯文侯投以夜光之璧何則兩主

二臣剖心析肝相信豈移於浮辭哉故女無美惡

入宮見妬士無賢不肖入朝見嫉昔者司馬喜臄

脚於宋卒相中山范雎摺脇折齒於魏卒爲應侯

此二人者皆信必然之畫捐朋黨之私挾孤獨之

交故不能自免於嫉妬之人也是以申徒狄蹈雍

之河申徒狄諫而不聽負石自投河徐衍負石入海徐衍周末人不容

身於世義不苟取比周於朝以移主上之心故百里奚乞食於路穆公委之以政甯戚飯牛車下而桓公任之以國此二人豈素宦於朝借譽於左右然後二主用之哉感於心合於意堅如膠漆昆弟不能離豈惑於衆口哉故偏聽生奸獨任成亂昔魯聽季孫之說逐孔子宋信子冉之計囚墨翟夫以孔墨之辯不能自免讒諛而二國以危何則衆口鑠金積毀銷骨是以秦用戎人由余而霸中國齊用越人子臧而強威宣此二國豈拘於俗牽於世繁苛偏之辭哉公聽並觀垂明當世故意合則

胡越爲昆弟由余子臧是矣不合則骨肉爲讐敵  
朱象管蔡是矣今人主誠能用齊秦之明後宋魯  
之聽則五霸不足侔三王易爲比也是以聖王覺  
悟捐子之之心而不悅田常之賢封比干之後修  
孕婦之墓故功業覆於天下何則欲善無厭也夫  
晉文公親其讐而強霸諸侯寺人勃齊桓公用其  
仇而一匡天下仲管何則慈仁殷勤誠嘉於心此不  
可以虛辭借也至夫秦用商鞅之法東弱韓魏立  
強天下而卒東裂之越用大夫種之謀禽勁吳而  
霸中國遂誅其身是以孫叔敖三去相而不悔孫叔

敖楚之處士也三為相而不喜知其材自於陵子得之也三去相而不悔知其非已之罪也

仲辭三公為人灌園於陵子終賢楚王欲以為相使使者往聘迎之子終出使

者與其妻逃今人主誠能去驕傲之心懷可報之乃為人灌園

意披心腹見情素衷肝膽施德厚終與之窮達無

愛於士則桀之狗可使吠堯而跖之客可使刺由

何況因萬乘之權假聖王之資乎然則荆軻湛七

族要離燔妻子豈足為大王道哉臣聞明月之珠

夜光之璧以暗投人於道眾莫不按劍相盼何則

無因而至前也蟠木根柢輪囷離奇而為萬乘器

者何則以左右先為之容也故無因而至前雖出

隋侯之珠夜光之璧祗足結怨而不見德故有人  
先談則枯木朽株樹功而不忘今天下布衣窮居  
之士身在貧賤雖蒙堯舜之術挾伊管之辯懷龍  
逢比干之意欲盡忠當世之君而素無根柢之容  
雖竭精神欲開忠信輔人主之治則人主必襲按  
劍相盼之跡矣是使布衣之士不得爲枯木朽株  
之資也是以聖王制世御俗獨化於陶鈞之上而  
不牽乎卑辭之語不奪乎衆多之口故秦皇帝任  
中庶子蒙嘉之言以信荊軻之說而匕首竊發周  
文王獵涇渭載呂尚而歸以王天下秦信左右而

亡周用烏集而王何則以其能越拘攣之語馳域

外之議獨觀於昭曠之道也今人主沈諂諛之辭

牽於帷牆之制使不羈之士與牛驥同皁

皁食牛馬器

此鮑焦所以忿於世而不留富貴之樂也

鮑焦怨世不用

已采蘧於道子貢難曰非其世而采其蘧此焦之有哉弃其蘧乃立枯於洛水之上臣聞盛

飾入朝者不以私污義砥厲名號者不利傷行

故里名勝毋曾子不入邑號朝歌墨子迴車今欲

使天下恢廓之士誘於威重之權脅於位勢之貴

回面污行以事諂諛之人而求親近於左右則士

有伏死堀穴巖藪之中耳安有盡忠信而趨闕下

者哉

緹縈

大舍令淳如意女

上文帝書

妾父爲吏齊中皆稱其廉平今坐法當刑妾傷夫死者不可復生刑者不可復屬雖後欲改過自新其道亡繇也妾願沒入爲官婢以贖父刑罪使得自新書奏天子憐悲其意

漢景帝

鄧先

謁者僕射

對景皇帝誅晁錯非

景帝三年吳楚反袁盎說上誅晃錯鄧公擊  
吳楚還見上上問曰聞晃錯死吳楚罷不鄧

公曰

吳王爲反數十年矣發怒削地以誅錯爲名其意  
非在錯也且臣恐天下之士噤口不敢復言也夫  
晃錯患諸侯彊大不可制故請削地以尊京師萬  
世之利也計畫始行卒受大戮內杜忠臣之口外  
爲諸侯報仇臣竊爲陛下不取也於是景帝默然  
良久曰公言善吾亦恨之

枚乘

字叔淮陰人

奏吳王書

乘初爲吳王濞郎中吳王之謀爲逆也乘奏書諫之

臣聞得全者昌失全者亡舜無立錐之地以有天下禹無十戶之聚以王諸侯湯武之士不過百里上不絕三光之明下不傷百姓之心者有王術也故父子之道天性也忠臣不避重誅以直諫則事無遺策功流萬世臣乘願披腹心而效愚忠惟大王少加意念惻怛之心於臣乘言夫以一縷之任係千鈞之重上懸之無極之高下垂之不測之淵

雖甚愚之人猶知哀其將絕也馬方駭鼓而驚之

繫方絕又重鎮之繫絕於天不可復結墜入深淵

難以復出齊東郭亥欲攻田氏子貢曰今子士也

任繁千鈞之重上懸之於無極之高下垂於不測

之深傍人皆畏其絕而造之者不知其子之謂乎

馬方駭鼓而驚之繫方絕重鎮之馬奔車覆六轡

不禁繫絕其高墜入于深其危必矣亥曰吾已矣

其出不出間不容髮言其微切甚急能聽忠臣之言百舉

必脫必若所欲爲危於累卵難於上天變所欲爲

易於反掌安於泰山今欲極天命之上壽敝無窮

之極樂究萬乘之勢不出反掌之易居泰山之安

而欲乘累卵之危走上天之難此愚臣之所大惑

也人性有畏其景而惡其跡者卻背而走迹愈多  
景愈疾不知就陰而止景滅迹絕欲人勿聞莫若  
勿言欲人勿知莫若勿爲欲湯之滄

滄寒也

一人炊

之百人揚之無益也不如絕薪止火而已不絕之  
於彼而救之於此譬猶抱薪而救火也養由基楚  
之善射者也去楊葉百步百發百中楊葉之人加  
百中焉可謂善射矣然其所止百步之內耳比於  
臣乘未知操弓持矢也福生有基禍生有胎納其  
基絕其胎禍何自來泰山之雷穿石殫極之統斷  
幹

統占經字殫盡也

水非石之鑽索非木之鋸漸靡使之

然也夫銖銖而稱之至石必差寸寸而度之至丈  
必過石稱丈量徑而寡失夫十圍之木始生而蘖  
足可搔而絕手可擢而振據其未生先其未形磨  
礲砥礪不見其損有時而盡種樹畜養不見其益  
有時而大積德累行不知其善有時而用棄義背  
理不知其惡有時而亡臣願大王熟計而身行之  
此百世不易之道也

再上書諫吳王

昔秦西舉胡戎之難北備榆中之關南距羗作之  
塞東當六國之從六國乘信陵之藉

無忌常總五國却秦有地

也黃明蘇秦之約厲荆軻之威并力一心以備秦然

秦卒禽六國滅其社稷而并天下是何也則地利不同而民輕重不等也今漢據全秦之地兼六國之衆修戎狄之義而南朝羗祚此其與秦地相什而民相百大王之所明知也今夫譏諛之臣爲大王計者不論骨肉之義民之輕重國之大小以爲吳禍此臣所以爲大王患也夫舉吳兵以訾於漢

言量也

譬猶蠅蚋之附羣牛腐肉之齒利劒鋒接必無事

矣天下聞吳率失職諸侯願責先帝之遺約今漢親誅其三公以謝前過是大王威加於天下而功

越於湯武也夫吳有諸侯之位而富貴於天子有

隱匿之名而居過於中國夫漢并二十四郡十七

諸侯方輸錯出軍行數千里不絕於郊其珍怪不

如山東之府轉粟西鄉陸行不絕水行滿河不如

海陵之倉海陵縣名有吳太倉修治上林雜以離宮積聚玩

好園守禽獸不如長洲之苑吳苑也游曲臺臨上路

不如朝夕之池以海水朝夕爲池深壁高壘副以關城不

如江淮之險此臣之所爲大王樂也今大王還兵

疾歸尚得十半不然漢知吳之有吞天下之心赫

然加怒遣羽林黃頭循江而下羽林黃頭郎襲大

王之都魯東海絕吳之饒道梁王飾車騎習戰射  
積粟固守以備滎陽待吳之饑大王雖欲反都亦  
不得已夫三淮南之計不負其約齊王殺身以滅  
其迹四國不得出兵其郡趙囚邯鄲此不可掩亦  
已明矣今大王以去千里之國而制於十里之內  
矣張韓將北地弓高宿左右兵不得下壁軍不得  
太息臣竊哀之願大王熟察焉

漢武帝

董仲舒

廣川人  
膠西相

賢良策一

武帝卽位舉賢良文學之士前後百數而仲舒以賢良對策焉

陛下發德音下明詔求天命與情性皆非愚臣之所能及也臣謹按春秋之中視前世已行之事以觀天人相與之際甚可畏也國家將有失道之敗而天廼先出災害以譴告之不知自省又出怪異以警懼之尚不知變而傷敗廼至以此見天心之仁愛人君而欲止其亂也自非大亡道之世者天盡欲扶持而全安之事在彊勉而已矣彊勉學問則聞見博而知益明彊勉行道則德日起而大有

功此皆可使還至而立有效者也

還讀詩曰

旋詩曰夙夜

匪懈

懈也

書云茂哉茂哉

茂勉也

皆彊勉之謂也道

者所繇適於治之路也

繇與同

仁義禮樂皆其具也

故聖王已沒而子孫長久安寧數百歲此皆禮樂

教化之功也王者未作樂之時廼用先王之樂宜

於世者而以深入教化於民教化之情不得雅頌

之樂不成故王者功成作樂樂其德也樂者所以

變民風化民俗也其變民也易其化人也著故聲

發於和而本於情接於肌膚藏於骨髓故王道雖

微缺而箎絃之聲未衰也夫虞氏之不爲政久矣

然而樂頌遺風猶有存者是以孔子在齊而聞韶也夫人君莫不欲安存而惡危亡然而政亂國危者甚衆所任者非其人而所繇者非其道是以政日以仆滅也夫周道衰於幽厲非道亡也幽厲不繇也至於宣王思昔先王之德興滯補弊明文武之功業周道粲然復興詩人美之而作上天祐之爲生賢佐後世稱誦至今不絕此夙夜不解行善之所致也孔子曰人能弘道非道弘人也故治亂廢興在於人非天降命不可得反其所操持詩謬失其統也聞天之所大奉使之王者必有非人

力所能致而自至者此受命之符也天下之人同心歸之若歸父母故天瑞應誠而至書曰白魚入于王舟有火復于王屋流爲烏此蓋受命之符也周公曰復哉復哉孔子曰德不孤必有鄰皆積善索德之效也及至後世淫佚衰微不能統理羣生諸侯背畔殘賊良民以爭壤土廢德教而任刑罰刑罰不中則生邪氣邪氣積於下怨惡畜於上上下不和則陰陽繆盭而妖孽生矣此災異所緣而起也臣聞命者天之令也性者生之質也情者人之欲也或夭或壽或仁或鄙陶冶而成之不能粹

美有治亂之所生故不齊也孔子曰君子之德風也小人之德草也草上之風必偃故堯舜行德則民仁壽桀紂行暴則民鄙夭夫上之化下下之從上猶泥之在鈞唯甄者之所爲猶金之在鎔唯冶者之所鑄綏之斯來動之斯和此之謂也臣謹按春秋之文求王道之端得之於正謂正也正次王王次春解春秋書春者天之所爲也正者王之所爲也其意曰上承天之所爲而下以正其所爲正王道之端云爾然則王者欲有所爲宜求其端於天道之大者在陰陽陽爲德陰爲刑刑主殺而德

主生是故陽常居大夏而以生育養長爲事陰長  
居大冬而積於空虛不用之處以此見天之任德不  
任刑也天使陽出布施於上而主歲功使陰入伏  
於下而時出佐陽陽不得陰之助亦不能獨成歲  
終陽以成歲爲名謂年首也此天意也王者承天意  
以從事故任德教而不任刑刑者不可任以治世  
猶陰之不可任以成歲也爲政而任刑不順於天  
故先王莫之肯爲也今廢先王德教之官而獨任  
執法之吏治民毋乃任刑之意與孔子曰不教而  
誅謂之虐虐政用於下而欲德教之被四海故難

成也臣謹按春秋謂一元之意一者萬物之所從始也元者辭之所謂大也謂一爲元者視大始而欲正本也春秋深探其本而反自貴者始故爲人君者正心以正朝廷正朝廷以正百官正百官以正萬民正萬民以正四方四方正遠近莫敢不壹於正而亡有邪氣奸其間者是以陰陽調而風雨時羣生和而萬民殖五穀熟而草木茂天地之間被潤澤而大豐美四海之內聞盛德而皆徠臣諸福之物可致之祥莫不畢至而王道終矣孔子曰鳳鳥不至河不出圖吾已矣夫自悲可致此物而身

卑賤不得致也。今陛下貴爲天子，富有四海，居得致之位，操可致之勢，又有能致之資，行高而恩厚，知明而意美，愛民而好士，可謂誼主矣。然而天地未應而美祥莫至者，何也？凡以教化不立而萬民不正也。夫萬民之從利也，如水之走下，不以教化隄防之，不能止也。是故教化立而姦邪皆止者，其隄防完也；教化廢而姦邪並出，刑罰不勝者，其隄防壞也。古之王者，明於此，是故南面而治天下，莫不以教化爲大務。立大學以教於國，設庠序以化於邑，漸民以仁，摩民以誼，節民以禮，故其刑罰甚

輕而禁不犯者教化行而習俗美也聖王之繼亂世也掃除其迹而悉去之復脩教化而崇起之教化已明習俗已成子孫循之行五六百歲尚未敗也至周之末世大爲亡道以失天下秦繼其後獨不能改又益甚之重禁文學不得挾書棄捐禮誼而惡聞之其心欲盡滅先聖之道而顓爲自恣苟簡之治故立爲天子十四歲而國破亡矣自古以來未嘗有以亂淫亂大敗天下之民如秦者也也益其遺毒餘烈至今未滅使習俗薄惡人民嚚頑抵冒殊扞口口不道忠信之言爲嚚頑孰爛如此之甚者

也孔子曰腐朽之木不可雕也糞土之牆不可圻也今漢繼秦之後如朽木糞牆矣雖欲善治之亡可柰何法出而姦生令下而詐起如以湯止沸抱薪救火愈甚亡益也竊譬之琴瑟不調甚者必解而更張之乃可鼓也爲政而不行甚者必變而化之方可理也當更張而不更張雖有良工不能善調也當更化而不更化雖有大賢不能善治也故漢得天下以來常欲善治而至今不可善治者失之於當更化而不更化也古人有言曰臨淵羨魚不如退而結網今臨政而願治七十餘歲矣不如

退而更化更化則可善治善治則災害日去福祿  
日來詩云宜民宜人受祿于天爲政而宜於民者  
固當受祿于天夫仁誼禮知信五常之道王者所  
當修飾也五者修飾故受天之祐而享鬼神之靈  
德施於方外延及羣生也

天子覽其對而  
異焉乃復策之

## 賢良策二

臣聞堯受命以天下爲憂而未以位爲樂也故誅  
逐亂臣務求賢聖是以得舜禹稷卨咎繇衆聖輔  
德賢能佐職教化大行天下和洽萬民皆安仁樂  
誼各得其宜動作應禮從容中道故孔子曰如有

王者必世而後仁此之謂也堯在位七十載廼遜

于位以禪虞舜堯崩天下不歸堯子丹朱而歸舜

舜知不可辟

辟讀曰避

乃卽天子之位以禹爲相因堯

之輔佐繼其統業是以垂拱無爲而天下治孔子

曰韶盡美矣又盡善也此之謂也至於殷紂逆天

暴物殺戮賢知殘賊百姓伯夷太公皆當世賢者

隱處而不爲臣守職之人皆奔走逃亡于河海

謂若鼓方叔播鼗武少師陽之屬也事在禮樂志

天下耗亂萬民不安耗

明也故天下去殷而從周文王順天理物師用賢聖

是以閔夭大顛散宜生等亦聚於朝廷愛施兆民

天下歸之故太公起海濱而卽三公也當此之時  
紂尚在上尊卑昏亂百姓散亡故文王悼痛而欲  
安之是以日昃而不暇食也孔子作春秋先正王  
而繫萬事見素王之文焉繇此觀之帝王之條貫  
同然而勞逸異者所遇之時異也孔子曰武盡美  
矣未盡善也此之謂也臣聞制度文采玄黃之飾  
所以明尊卑異貴賤而勸有德也故春秋受命所  
先制者改正朔易服色所以應天也然則宮室旌  
旗之制有法而然者也故孔子曰奢則不遜儉則  
固儉非聖人之中制也臣聞良玉不琢資質潤美

不待刻琢此亡異於達巷黨人不學而自知也然則常玉不琢不成文章君子不學不成其德臣聞聖王之治天下也少則習之學長則材諸位爵祿以養其德刑罰以威其惡故民曉於禮誼而耻犯其上武王行大誼平殘賊周公作禮樂以文之至於成康之隆囹圄空虛四十餘年此亦教化之漸而仁誼之流非獨傷肌膚之效也至秦則不然師申商之法行韓非之說憎帝王之道以貪狼爲俗非有文德以教訓於天下也誅名而不察實誅責也爲善不必免而犯惡未必刑也是以百官皆飾虛

辭而不顧實外有事君之禮內有背上之心造偽

飾詐趣利無耻又好用僭酷之吏千僭痛反也音賦歛

亡度竭民財力百姓散亡不得從耕織之業羣盜

並起是以刑者甚衆死者相望而姦不息俗化使

然也故孔子曰導之以政齊之以刑民免而無耻

此之謂也今陛下并有天下海內莫不率服廣覽

兼聽極羣下之知盡天下之美至德昭然施于方

外夜郎康居殊方萬里說德歸誼夜郎即西南夷也康居西域國也

此太平之致也然而功不加於百姓者殆王心未

加焉曾子曰尊其所聞則高明矣行其所知則光

大矣高明光大不在於它在乎加之意而已願陛下因用所聞設誠於內而致行之則三王何異哉陛下親耕藉田以爲農先夙寤晨興憂勞萬民思惟往古而務以求賢此亦堯舜之用心也然而未云獲者士素不厲也夫不素養士而欲求賢譬猶不琢玉而求文采也故養士之大者莫大乎太學太學者賢士之所關也教化之本原也今以一郡一國之衆對亡應書者

書謂舉賢良文  
學之詔書也

是王道往

往而絕也臣願陛下興太學置明師以養天下之士數考問以盡其材則英俊宜可得矣今之郡守

縣令民之師帥所使承流而宣化也故師帥不賢則主德不宣恩澤不流今吏旣亡教訓於下或不承用主上之法暴虐百姓與姦爲市貧窮孤弱冤苦失職甚不稱陛下之意是以陰陽錯繆氛氣充塞羣生寡遂黎民未濟皆長吏不明使至於此也夫長吏多出於郎中中郎吏二千石子弟選郎吏又以富訾未必賢也且古所謂功者以任官稱職爲差非所謂積日累久也故小材雖累日不離於小官賢材雖未久不害爲輔佐是以有司竭力盡知務治其業而以赴功今則不然累日以取貴積

久以致官是以廉耻貿亂賢不肖渾散未得其真  
臣愚以爲使諸列侯郡守二千石各擇其吏民之  
賢者歲貢各二人以給宿衛且以觀大臣之能所  
貢賢者有賞所貢不肖者有罰夫如是諸侯吏二千  
石皆盡心於求賢天下之士可得而官使也徧  
得天下之賢人則三王之盛易爲而堯舜之名可  
及也毋以日月爲功實試賢能爲上量材而授官  
錄德而定位則廉耻殊路賢不肖異處矣陛下加  
惠寬臣之罪令勿牽制於文始得切磋究之臣敢  
不盡愚

天子又復用之

賢良策三

臣聞論語曰有始有卒者其唯聖人庠今陛下幸加  
惠留聽於承學之臣復下明冊以切其意而究盡  
聖德非愚臣之所能臆也前所上對條貫靡竟統  
紀不終辭不別白指不分明此臣淺陋之罪也冊  
曰善言天者必有徵於人善言古者必有驗於今  
臣聞天者羣物之祖也故徧覆包函而無所殊建  
日月風雨以和之經陰陽寒暑以成之故聖人法  
天而立道亦溥愛而亡私布德施仁以厚之設誼  
立禮以導之春者天之所以生也仁者君之所以

愛也夏者天之所以長也德者君之所以養也霜  
者天之所以殺也刑者君之所以罰也繇此言之  
天人之徵古今之道也孔子作春秋上揆之天道  
下質諸人情參之於古考之於今故春秋之所譏  
災害之所加也春秋之所惡怪異之所施也書邦  
家之過兼災異之變以此見人之所爲其美惡之  
極乃與天地流通而往來相應此亦言天之一端  
也古者修教訓之官務以德善化民民已大化之  
後天下常亡一人之獄矣今世廢而不修亡以化  
民民以故棄仁誼而死財利是以犯法而罪多一

歲之獄以萬千數以此見古之不可不用也故春秋變古則譏之天令之謂命命非聖人不行質樸之謂性性非教化不成人欲之謂情情非度制不節是故王者上謹於承天意以順命也下務明教化民以成性也正法度之宜別上下之序以防欲也修此三者而大本舉矣人受命於天固超然異於羣生入有父子兄弟之親出有君臣上下之誼會聚相遇則有耆老長幼之施榮然有文以相接驩然有恩以相愛此人之所以貴也生五穀以食之桑麻以衣之六畜以養之服牛乘馬圉豹檻虎

是其得天之靈貴於物也故孔子曰天地之性人  
爲貴明於天性知自貴於物知自貴於物然後知  
仁誼知仁誼然後重禮節重禮節然後安處善安  
處善然後樂循理樂循理然後謂之君子故孔子  
曰不知命亡以爲君子此之謂也冊曰上嘉唐虞  
下悼桀紂寔微寔滅寔明寔昌之道虚心以改臣  
聞聚少成多積小致鉅故聖人莫不以晦致明以  
微致顯是以堯發於諸侯舜興庠深山非一日而  
顯蓋有漸以致之矣言出於已不可塞也行發於  
身不可掩也言行治之大者君子之所以動天地

也故盡小者大慎微者著詩云惟此文王小心翼翼  
翼故堯兢兢日行其道而舜業業日致其孝善積  
而名顯德章而身尊此其寔明寔昌之道也積善  
在身猶長日加益而人不知也積惡在身猶火銷  
膏而人不見也非明虛情性察虛流俗者孰能知  
之此唐虞之所以得令名而桀紂之可爲悼懼者  
也夫善惡之相從如影鄉之應形聲也故桀紂暴  
謾讒賊並進賢知隱伏惡日顯國日亂晏然自以  
如日在天終陵夷而大壞夫暴逆不仁者非一日  
而亡也亦以漸至故桀紂雖亡道然猶享國十餘

年此其寢微寢滅之道也冊曰三王之教所祖不同而皆有失或謂久而不易者道也意豈異哉臣聞夫樂而不亂復而不厭者謂之道道者萬世亡弊弊者道之失也先王之道必有偏而不起之處故政有眊而不行舉其偏者以補其弊而已矣三王之道所祖不同非其相反將以抹溢扶衰所遭之變然也故孔子曰亡爲而治者其舜庠改正朔易服色以順天命而已其餘盡循堯道何更爲哉故王者有改制之名亡變道之實然夏上忠殷上質周上文者所繼之抹當用此也孔子曰殷因於

夏禮所損益可知也周因於殷禮所損益可知也其或繼周者雖百世可知也此言百王之用以此三者矣夏因於虞而獨不言所損益者其道如一而所上同也道之大原出于天天不變道亦不變是以禹繼舜舜繼堯三聖相受而守一道亡救弊之政故不言其所損益也繇是觀之繼治世者其道同繼亂世者其道變今漢大亂之後若宜少損周之文致用夏之忠者陛下有明惠嘉道愍世俗之靡薄悼王道之不昭故舉賢良方正之士論誼考問將欲興仁誼之休德明帝王之法制建太平

之道也臣愚不肖述所聞誦所學道師之言靡能  
勿失耳若乃論政事之得失察天下之息耗此大  
臣輔佐之職三公九卿之任非臣仲舒所能及也  
然而臣竊有怪者夫古之天下亦今之天下今之  
天下亦古之天下共是天下古亦大治上下和睦  
習俗美盛不令而行不禁而止吏亡姦邪民亡盜  
賊囹圄空虛德潤草木澤被四海鳳凰來集麒麟  
來游以古準今壹何不相逮之遠也安所繆繆而  
陵夷若是意者有所失於古之道與有所詭於天  
之理與試迹之古返之於天黨可得見乎夫天亦

有所公予予之齒者去其角傳其翼者兩其足是  
所受大者不得取小也古之所予祿者不食於力  
不動於末是亦受大者不得取小與天同意者也  
夫已受大又取小天不能足而況人乎此民之所  
以囂囂苦不足也身寵而載高位家溫而食厚祿  
因乘富貴之資力以與民爭利於下民安能如之  
哉是故衆其奴婢多其牛羊廣其田宅博其產業  
畜其積委務此而亡已以迫蹙民日削月朘朘音  
寢以大窮富者奢侈羨溢貧者窮極愁苦窮急愁  
苦而上不救則民不樂生民不樂生尚不避死安

能避罪此刑罰之所以蕃而姦邪不可勝者也故  
受祿之家食祿而已不與民爭業然後利可均布  
而民可家足此上天之理而亦太古之道天子之  
所宜法以爲制大夫之所當循以爲行也故公儀

子相魯

公儀休

之其家見織帛怒而出其妻食於舍而茹葵愠

而拔其葵

食菜曰茹

曰吾已食祿又奪園夫紅女利虐古之賢人

君子在列位者皆如是是故下高其行而從其教民化其廉而  
不貪鄙及至周室之衰其卿大夫緩於誼而急於利  
亡推讓之風而有爭田之訟故詩人疾而刺之曰  
節彼南山惟石巖巖赫赫師尹民具爾瞻爾好誼

則民鄉仁而俗善爾好利則民好邪而俗敗由是  
觀之天子大夫者下民之所視效遠方之所四面  
而內望也近者視而放之遠者望而效之豈可以  
居賢人之位而爲庶人行哉夫皇皇求財利常恐  
乏匱者庶人之意也皇皇求仁義常恐不能化民  
者大夫之意也易曰負且乘致寇至乘車者君子  
之位也負擔者小人之事也此言居君子之位而  
爲庶人之行者其患禍必至也若居君子之位當  
君子之行則舍公儀休之相魯亡可爲者矣春秋  
大一統者天地之常經古今之通誼也今師異道

人異論百家殊方指意不同是以上亡以持一統  
法制數變下不知所守臣愚以爲諸不在六藝之  
科孔子之術者皆絕其道勿使並進邪僻之說滅  
息然後統紀可一而法度可明民知所從矣

對既畢天

子以仲舒  
爲江都相

### 論限民田

古者稅民不過什一其求易共使民不過三日其  
力易足民財內足以養老盡孝外足以事上共稅  
下足以畜妻子極愛故民說從上至秦則不然用  
商鞅之法改帝王之制除井田民得買賣富者田

運阡陌貧者亡立錐之地又潁川澤之利管山林  
之饒荒淫越制踰侈以相高邑有人君之尊里有  
公侯之富小民安得不困又加月爲更卒已復爲  
正一歲屯戍一歲力役三十倍於古田租口賦鹽  
鐵之利二十倍於古或耕豪民之田見稅什五故  
貧民常衣牛馬之衣而食犬彘之食重以貪暴之  
吏刑戮妄加民愁亡聊亡逃山林轉爲盜賊赭衣  
半道斷獄歲以千萬數漢興循而未改古井田法  
雖難卒行宜少近古限民名田以贍不足塞并兼  
之路鹽鐵皆歸於民去奴婢除專殺之威薄賦歛

省繇役以寬民力然後可善治也

### 三仁對

臣聞昔者魯君問柳下惠吾欲伐齊何如柳下惠曰不可歸而有憂色曰吾聞伐國不問仁人此言何爲至於我哉徒見問耳且猶羞之况設詐以伐吳乎由此言之粵本無一仁夫仁人者正其誼不謀其利明其道不計其功是以仲尼之門五尺之童羞稱五伯爲其先詐力而後仁誼也苟爲詐而已故不足稱於大君子之門也五伯比於他諸侯爲賢其比三王猶砥砒之與美玉也王曰善

郊祀對

仲舒相膠西王以病免居家以脩學著書爲  
事朝廷有大議使使者及廷尉張湯就其家  
而問之其對皆有明法

廷尉臣湯昧死言臣湯承制以郊事問故膠西相  
仲舒臣仲舒對曰所聞古者天子之禮莫重於郊  
郊常以正月上辛日者所以先百神而最居前

治春秋此對止據春秋所書魯郊言之未足以該  
天子之禮啖助曰天子以冬至祭上帝又以夏之  
孟春祈穀于上帝禮曰於郊故謂之郊魯以周公  
之故特得以孟春祈穀于上帝亦謂之郊郊皆謂  
辛日上辛不吉則卜中辛又不吉則卜下辛所謂  
吉事先近也若以冬至則不當卜此說爲長

禮三年喪不祭其先而不敢廢郊郊重於宗廟天

尊於人也王制喪三年不祭牲祭天王制曰祭天

地之牛角繭栗宗廟之牛角握賓客之牛角尺此

言德滋美而牲滋微也握謂長春秋曰魯祭周公

用白牡色白貴純也魯公羊子曰魯祭周公用白牡

牡殷牲也駢欄赤脊周牲也帝牲在滌三月牲貴

肥潔而不貪其大也禮曰養牲之官名也滌三月滌者

成牲凡養牲之道務在肥潔而已駒犢未能芻秣之

食莫如令食其母便秩謂日食粟料有品以臣湯

謹問仲舒魯祀周公用白牡非禮也臣仲舒對曰

禮也臣湯問周天子用騂剛群公不毛周公諸公也何以得用純牲臣仲舒對曰武王崩成王幼而在襁褓之中周公繼文武之業成二聖之功德漸天地澤被四海故成王賢而貴之詩曰無德不報故成王使祭周公以白牡上不得與天子同色下有異於諸侯臣仲舒愚以爲報德之禮臣湯問仲舒天子祭天地諸侯祭土公羊子曰魯郊非禮也天子祭天諸侯祭土註土謂魯何緣以祭郊臣仲舒對曰周公傳成王成王遂及聖功莫大於此周公聖人也有祭於天道成王令魯郊也臣湯問仲舒魯祭周公用白牡其

郊何用臣仲舒對曰魯郊用純騂剛周色尚赤魯以天子命郊故以騂臣湯問仲舒祠宗廟或以鶩當鳧鶩非鳧可用否臣仲舒對曰鶩非鳧鳧非鶩也臣聞孔子入太廟每事問慎之至也陛下祭躬親齋戒沐浴以承宗廟甚敬謹柰何以鳧當鶩鶩當鳧名實不相應以承太廟不亦不稱乎臣仲舒愚以爲不可臣犬馬齒衰賜骸骨伏陋巷陛下乃奉使使九卿問臣以朝廷之事臣愚陋曾不足以承明詔奉大對臣仲舒冒死以聞

主父偃

臨菑人  
謁者

諫伐匈奴

臣聞明主不惡切諫以博觀忠臣不敢避重誅以直諫是故事無遺策而功流萬世今臣不敢隱忠避死以效愚計願陛下幸赦而少察之司馬法曰國雖大好戰必亡天下雖平忘戰必危天下既平天子大凱大凱周禮還師振旅之樂春蒐秋獮諸侯春振旅秋治兵所以不忘戰也且夫怒者逆德也兵者凶器也爭者末節也古者人君一怒必伏尸流血故聖王重行之夫務戰勝窮武事者未有不悔者也昔秦皇帝任戰勝之威蠶食天下并吞戰國海內爲

一功齊三代務勝不休欲攻匈奴李斯諫曰不可  
夫匈奴無城郭之居委積之守遷徙鳥舉難得而  
制也輕兵深入糧食必絕踵糧以行重不及事得  
其地不足以爲利也遇其民不可役而守也勝必  
殺之非民父母也靡敝中國快心匈奴非長策也  
秦皇帝不聽遂使蒙恬將兵攻胡辟地千里以河  
爲境地固澤鹹鹵不生五穀然後發天下丁男以  
守北河暴兵露師十有餘年死者不可勝數終不  
能踰河而北是豈人衆不足兵革不備哉其勢不  
可也又使天下蜚芻輓粟起於東陲

陲在東萊音純琅邪

負海之郡轉輸北河率三十鍾而致一石男子疾  
耕不足於糧饟女子紡績不足於帷幕百姓靡敝  
孤寡老弱不能相養道路死者相望蓋天下始畔  
秦也及至高皇帝定天下略地於邊聞匈奴聚於  
代谷之外而欲擊之御史成進諫曰不可夫匈奴  
之性獸聚而鳥散從之而搏影今以陛下盛德攻  
匈奴臣竊危之高帝不聽遂北至於代谷果有平  
城之圍高皇帝蓋悔之甚乃使劉敬徙結和親之  
約然後天下忘干戈之事故兵法曰興師十萬日  
費千金夫秦常積衆暴兵數十萬人雖有覆軍殺

將係虜單于之功亦適足以結怨深讐不足以償天下之費夫上虛府庫下敝百姓甘心於外國非完事也夫匈奴難得而制非一世也行盜侵驅所以爲業也天性固然上及虞夏殷周固弗程督禽獸畜之不屬爲人夫上不觀虞夏殷周之統而下脩近世之失此臣之所大憂百姓之所疾苦也且夫兵久則變生事苦則慮易乃使邊境之民靡敝愁苦而有離心將吏相疑而外市故尉它章邯得以成其私也夫秦政之所以不行者權分乎二子此得失之效也故周書曰安危在出令存亡在所

用願陛下詳察之少加意而熟慮焉

徐樂

趙人中大夫

上言世務

臣聞天下之患在於土崩不在於瓦解古今一也何謂土崩秦之末世是也陳涉無千乘之尊及土之地身非王公大人名族之後無鄉曲之譽非有孔墨曾子之賢陶朱猗頓之富也然起窮巷奮棘矜偏袒大呼而天下從風此其故何也由民困而主不恤下怨而上不知也俗已亂而政不脩此三者陳涉之所以爲資也是之謂土崩故曰天下之

患在於土崩何謂瓦解吳楚齊趙之兵是也七國  
謀爲大逆號皆稱萬乘之君帶甲數十萬威足以  
嚴其境內財足以勸其士民然不能西攘尺寸之  
地而身爲禽於中原者此其故何也非權輕於匹  
夫而兵弱於陳涉也當是之時先帝之德澤未衰  
而安土樂俗之民衆故諸侯無境外之助此之謂  
瓦解故曰天下之患不在瓦解由是觀之天下誠  
有土崩之勢雖布衣窮處之士或首惡而危海內  
陳涉是也況三晉之君或存乎天下雖未有大治  
也誠能無土崩之勢雖有疆國勁兵不得旋踵而

身爲禽矣吳楚齊趙是也况群臣百姓能爲亂乎哉此二體者安危之明要也賢主所留意而深察也間者關東五穀不登年歲未復民多窮困重之以邊境之事推數循理而觀之則民且有不安全其處者矣不安故易動易動者土崩之勢也故賢主獨觀萬化之原明於安危之機脩之廟堂之上而銷未形之患其要期使天下無土崩之勢而已矣故雖有疆國勁兵陛下遂走獸射蜚鳥弘游燕之囿淫縱恣之觀極馳騁之樂自若也金石絲竹之聲不絕於耳帷帳之私俳優侏儒之笑不乏於前而

天下無宿憂名何必湯武俗何必成康雖然臣竊  
以爲陛下天然之聖寬仁之資而誠以天下爲務  
則湯武之名不難侔而成康之俗可復興也此二  
者立然後處尊安之實揚名廣譽於當世親天下  
而服四夷餘恩遺德爲數世隆南面負宸攝袂而  
揖王公此陛下之所服也臣聞圖王不成其敝足  
以安安則陛下何求而不得何爲而不成何征而  
不服乎哉

終軍

濟南人

白麟奇木對

上幸雍祠五時獲白麟一角而五蹄

每足五蹄又

得奇木其枝旁出輒復合于木上上異此二

物博謀群臣終軍對曰

臣聞詩頌君德樂舞后功異經而同指明盛德之

所隆也南越竄屏蔽葦與鳥魚同群正朔不及其

俗有司臨境而東甌內附閩王伏辜南粵賴救北

胡隨畜薦居

薦音荐屢也言隨畜牧屢易故居也左傳戎狄荐居是也

禽獸行

虎狼心上古未能攝大將軍秉鉞單于犇幕驃騎

抗旌昆邪右袵是澤南洽而威北暢也若罰不阿

近舉不遺遠設官竢賢縣賞待功能者進以保祿



罷者退而勞力刑於宇內矣履衆美而不足懷聖  
明而不專建三宮之文質章厥職之所宜封禪之  
君無聞焉夫天命初定萬事草創及臻六合同風  
九州共貫必待明聖潤色祖業傳於無窮故周至  
成王然後制定而休徵之應見陛下盛日月之光  
垂聖思於勒成專神明之敬奉燔瘞於郊宮獻享  
之精交神積和之氣塞明而異獸來獲宜矣昔武  
王中流未濟白魚入于王舟俯取以燎群公咸曰  
休哉今郊祀未見於神祇而獲獸以饋此天之所  
以示饗而上通之符合也宜因昭時今日改定告

元苴白茅於江淮發嘉號於營丘以應緝熙使著  
事者有紀焉蓋六鷁退飛逆也白魚登舟順也夫  
明闇之徵上亂飛鳥下動淵魚各以類推今野獸  
并角明同本也衆支內附示無外也若此之應殆  
將有解編髮削左衽襲冠帶要衣裳而蒙化者焉  
斯拱而俟之耳

朱買臣

字翁子吳人  
主爵都尉

上言破東越

故東越王居保泉山一人守險千人不得上今聞  
東越王更徙處南行去泉山五百里居大澤中今

發兵浮海直指泉山陳舟列兵席卷南行可破滅也

王褒

字子淵蜀人諫大夫

聖主得賢臣頌

夫荷旃被毳者難與道純絲之麗密羹藜含糗者不足與論太牢之滋味今臣辟在西蜀生於窮巷之中長於蓬茨之下無有遊觀廣覽之知顧有至愚極陋之累不足以塞厚望應明指雖然敢不略陳愚而抒情素記曰共惟春秋法五始之要在乎審已正統而已夫賢者國家之器用也所任賢則

趨舍省而功施普器用利則用力少而就效衆故

工人之用鈍器也勞筋苦骨終日矻矻及至巧治

鑄千將之樸清水淬其鋒越砥歛其鐔水斷蛟龍

陸剽犀革忽若羣泥畫塗羣帶也泥泥灑地也塗泥也如以帶瑞泥灑之

地以刀畫泥中言其易如此則使離婁督繩公輸削墨雖崇

臺五增延袤百丈而不溷者工用相得也庸人之

御駑馬亦傷吻敝策而不進於行匈喘膚汗人極

馬倦及至駕齧邾驂乘旦良馬低頭齧至邾故曰

旦王良執靶王良邾無恤字伯樂靶音霸謂轡也韓哀附輿韓哀韓

縱馳騁驚忽如景靡過都越國蹶如歷塊追奔電

逐遺風周流八極萬里壹息何其遼哉人馬相得也故服絺綌之涼者不苦盛暑之鬱燠襲貂狐之煖者不憂至寒之悽愴何則有其具者易其備賢人君子亦聖王之所以易海內也是以嘔喻受之

嘔喻和悅貌

開寬裕之路以延天下英俊也夫竭知附

賢者必建仁策索人求士者必樹伯迹昔周公躬吐握之勞故有圉空之隆齊桓設庭燎之禮故有匡合之功有以九九小術而君不納之况大於九九者乎於是桓公設庭燎之禮而見之九九計數之書若今筭經由此觀之君人者

勤於求賢而逸於得人人臣亦然昔賢者之未遭

遇也圖事揆策則君不用其謀陳見愴誠則上不  
然其信進仕不得施效斥逐又非其愆是故伊尹  
勤於鼎俎太公困於鼓刀

鼓刀謂屠牛於朝歌

百里自鬻

子飯牛離此患也及其遇明君遭聖主也運籌合  
上意諫諍即見聽進退得關其忠任職得行其術  
去卑辱奧潔而升本朝離䟽釋躋而享膏粱剖符  
錫壤而光祖考傳之子孫以資說士故世必有聖  
知之君而後有賢明之臣故虎嘯而風冽龍興而  
致雲蟄蟀竢秋吟蜉蝣出以陰易曰飛龍在天利  
見大人詩曰思皇多士生此王國故世平主聖俊

艾將自至若堯舜禹湯文武之君獲稷契臯陶伊  
尹昌望明明在朝穆穆布列聚精會神相得益章  
雖伯牙操遞鍾逢門子鸞鳥號猶未足以喻其意  
也故聖主必待賢臣而弘功業俊士亦侯明主以  
顯其德上下俱欲驩然交欣千載壹合論說無疑  
翼乎如鴻毛遇順風沛乎如巨魚縱大壑其得意  
若此則胡禁不止局令不行化溢四表橫被無窮  
遐夷貢獻萬祥畢臻是以聖主不徧窺望而視已  
明不單傾耳而聽已聰恩從祥風翔德與和氣游  
太平之責塞優游之望得遵遊自然之執恬淡無

爲之場休徵自至壽考無疆雍容垂拱永永萬年  
何必偃仰詘信若彭祖呶噓呼及如僑松耿然絕  
俗離世哉詩云濟濟多士文王以寧蓋信乎其以  
寧也